

13. Adakah terdapat akaun yang dilindungi secara berasingan?

- Akaun bersama – Akaun bersama mendapat perlindungan insurans deposit secara berasingan asalkan rekod bank ahli menyenaraikan nama pemegang-pemegang akaun bersama.
- Akaun amanah – Bagi akaun amanah, benefisiari boleh mendapat perlindungan secara berasingan sekiranya pemegang amanah mengemukakan kepentingan setiap benefisiari dan amaun yang tertakluk kepada setiap benefisiari pada rekod bank ahli. Setiap benefisiari dilindungi sehingga RM250,000 secara berasingan daripada deposit diinsuranskan mereka yang lain.
- Akaun perniagaan milikan tunggal, perkongsian atau praktik profesional (contohnya, arkitek atau doktor gigi) – Akaun-akaun ini juga dilindungi secara berasingan sehingga had RM250,000.

Contoh ini menjelaskan perlindungan insurans deposit berasingan bagi pendeposit yang memegang beberapa akaun dalam sesebuah bank ahli:

Pendeposit	Jenis deposit	Amaun (RM)	Dilindungi (RM)
Ahmad	Simpanan	300,000	250,000
Ahmad dan isteri	Semasa	300,000	250,000
Ahmad, isteri dan anak perempuan	Simpanan	250,000	250,000
Ahmad, Leong & Co. (firma guaman)	Semasa	200,000	200,000
Ahmad & Ali Sdn. Bhd.	Semasa	50,000	50,000
Jumlah deposit		1,100,000	
Jumlah deposit dilindungi			1,000,000

14. Apakah yang akan berlaku kepada deposit saya sekiranya dua bank ahli bergabung?

Anda akan terus menikmati perlindungan insurans deposit berasingan bagi tempoh dua tahun atau selepas kematangan atau sehingga pengeluaran deposit, yang mana lebih awal.

15. Sekiranya berlaku kegagalan bank ahli, bagaimana saya boleh membuat tuntutan insurans deposit?

Anda tidak perlu membuat sebarang tuntutan. PIDM akan membuat pengumuman mengenai pembayaran balik wang deposit yang dilindungi. Pembayaran balik deposit akan dibuat berdasarkan rekod pendeposit daripada bank ahli.

16. Saya seorang bukan pemastautin Malaysia. Adakah deposit saya dilindungi?

Tempat tinggal atau kewarganegaraan anda tidak menjejaskan perlindungan insurans deposit. Deposit yang disimpan di bank ahli PIDM akan dilindungi sehingga RM250,000 bagi setiap pendeposit di setiap bank ahli.

17. Adakah deposit dalam cawangan dan anak syarikat bank-bank domestik yang beroperasi di luar Malaysia dilindungi?

Tidak, tetapi deposit itu mungkin dilindungi oleh skim perlindungan atau insurans deposit beroperasi di negara cawangan atau anak syarikat tersebut.

18. Bagaimanakah saya boleh dapatkan maklumat lanjut mengenai perlindungan insurans deposit?

- Sila hubungi talian maklumat bebas tol PIDM **1-800-88-1266**, Isnin hingga Jumaat dari 8.30 pagi hingga 5.30 petang
- Emel kepada info@pidm.gov.my
- Layari laman web PIDM di www.pidm.gov.my



Perbadanan Insurans Deposit Malaysia
Melindungi Simpanan Dan Insurans Anda Di Malaysia

Bahagian Komunikasi & Hal Ehwal Awam
Aras 12, Quill 7, No. 9, Jalan Stesen Sentral 5,
Kuala Lumpur Sentral, 50470 Kuala Lumpur.
Telefon: 603-2173 7436 Faks: 603-2173 7527 / 2260 7432



Perbadanan Insurans Deposit Malaysia
Melindungi Simpanan Dan Insurans Anda Di Malaysia

INSURANS DEPOSIT

Kini kami mendapat **lebih perlindungan** daripada **PIDM!**

Ini berita baik!



Perbadanan Insurans Deposit Malaysia (PIDM) melindungi deposit bank serta manfaat takaful dan insurans anda. Menerusi Sistem Insurans Deposit dan Sistem Perlindungan Manfaat Takaful dan Insurans yang ditadbir oleh PIDM, pendeposit serta pemilik sijil takaful dan polisi insurans kini menikmati perlindungan yang eksplisit di sisi undang-undang bagi deposit bank serta manfaat takaful dan insurans yang layak. Ini sejajar dengan mandat PIDM bagi menggalak dan menyumbang kepada kestabilan sistem kewangan Malaysia.

Apakah PIDM?

PIDM ialah sebuah agensi Kerajaan yang ditubuhkan di bawah Akta Perbadanan Insurans Deposit Malaysia (Akta PIDM). PIDM ditubuhkan pada 2005 untuk mentadbir sistem insurans deposit nasional bagi melindungi pendeposit. Mulai 31 Disember 2010, peranan PIDM telah diperluaskan bagi mentadbir Sistem Perlindungan Manfaat Takaful dan Insurans yang menyediakan perlindungan kepada pemilik sijil takaful dan polisi insurans.

Apakah perlindungan yang disediakan oleh PIDM?

Sistem Insurans Deposit	Sistem Perlindungan Manfaat Takaful dan Insurans
Melindungi pendeposit daripada kehilangan deposit diinsuranskan yang disimpan di bank-bank ahli, sekiranya berlaku kegagalan bank.	Melindungi pemilik sijil takaful dan polisi insurans daripada kehilangan manfaat takaful dan insurans yang layak, sekiranya berlaku kegagalan ahli penginsurans.

Bagaimanakah perlindungan ini memanfaatkan saya?

- PIDM melindungi deposit bank anda dan akan membayar balik dengan segera deposit yang dilindungi sekiranya berlaku kegagalan bank ahli.
- PIDM melindungi anda daripada kehilangan manfaat takaful atau insurans yang layak sekiranya berlaku kegagalan ahli penginsurans.
- Perlindungan ini disediakan oleh PIDM secara automatik dan tidak memerlukan sebarang permohonan.
- Pendeposit atau pemilik sijil takaful dan polisi insurans tidak dikenakan bayaran bagi perlindungan yang disediakan oleh PIDM.

1. Apakah insurans deposit?

Insurans deposit ialah satu sistem yang melindungi pendeposit, sama ada individu atau entiti perniagaan, daripada kehilangan wang deposit diinsuranskan yang disimpan di bank-bank ahli sekiranya berlaku kegagalan bank. Sistem insurans deposit di Malaysia ditadbir oleh PIDM.

2. Bank-bank yang manakah merupakan bank ahli PIDM?

Bank-bank ahli PIDM ialah semua bank perdagangan berlesen di bawah Akta Bank dan Institusi-Institusi Kewangan 1989 dan semua bank Islam berlesen di bawah Akta Bank Islam 1983, termasuk bank-bank asing yang beroperasi di Malaysia. Keahlian adalah wajib mengikut peruntukan Akta Perbadanan Insurans Deposit Malaysia (Akta PIDM).

Senarai bank yang merupakan bank ahli PIDM boleh diperolehi sama ada dengan menghubungi PIDM di talian **1-800-88-1266** atau menerusi laman web PIDM di **www.pidm.gov.my**. Sila perhatikan tanda keahlian ini di semua pintu masuk cawangan bank anda.



3. Perlukah saya memohon atau mendaftar bagi perlindungan insurans deposit?

Tidak, anda tidak perlu memohon atau mendaftar bagi perlindungan ini. Insurans deposit disediakan secara automatik bagi akaun deposit yang layak.

4. Apakah had perlindungan insurans deposit saya?

Deposit anda yang layak diinsuranskan dilindungi sehingga RM250,000 bagi setiap pendeposit di setiap bank ahli. Had RM250,000 ini termasuk amaun prinsipal deposit dan juga faedah/pulangan.

5. Bolehkah saya beli insurans tambahan bagi deposit saya sekiranya deposit saya melebihi RM250,000?

Tidak. Insurans deposit bukan produk insurans am dan hayat. Perlindungan ini disediakan oleh Kerajaan menerusi PIDM.

6. Apakah jenis deposit yang layak bagi insurans deposit?

Deposit yang layak termasuk akaun semasa, akaun simpanan, deposit tetap dan deposit mata wang asing.

7. Apakah jenis deposit yang TIDAK dilindungi?

Deposit yang tidak boleh dibayar di Malaysia, deposit

pasaran wang, instrumen deposit boleh niaga, deposit pembawa lain dan perjanjian pembelian semula tidak dilindungi oleh PIDM.

8. Adakah saham amanah layak mendapat perlindungan insurans deposit?

Tidak. Saham amanah tidak layak mendapat perlindungan insurans deposit.

9. Bagaimanakah saya boleh ketahui sekiranya deposit saya layak mendapat perlindungan insurans deposit?

Bank ahli sepatutnya memaklumkan kepada anda sama ada sesuatu produk deposit layak atau tidak layak mendapat perlindungan insurans deposit sebelum anda menyimpan wang di bank tersebut. Semua produk deposit yang layak mendapat perlindungan insurans deposit disenaraikan dalam satu daftar senarai yang boleh didapati di bank ahli.

Keperluan ini adalah sejajar dengan Peraturan Peruntukan Maklumat Insurans Deposit 2011 bagi memastikan bank-bank ahli menyediakan maklumat yang tepat, relevan dan terkini mengenai perlindungan insurans deposit dan skop perlindungan.



10. Adakah deposit Islam dan konvensional dilindungi secara berasingan?

Ya. Deposit Islam dan konvensional layak bagi had perlindungan yang berasingan sehingga RM250,000 bagi setiap pendeposit di setiap bank ahli.

11. Jika saya mempunyai deposit dalam beberapa bank ahli, adakah semua deposit saya akan dijumlahkan bagi tujuan perlindungan insurans deposit?

Tidak. Deposit anda di bank ahli yang berbeza dilindungi secara berasingan sehingga RM250,000 bagi setiap pendeposit di setiap bank ahli.

12. Sekiranya saya mempunyai deposit dalam beberapa cawangan sesebuah bank ahli, adakah semua deposit saya akan dilindungi secara berasingan?

Tidak. Deposit yang disimpan dalam cawangan berbeza sesebuah bank ahli akan dijumlahkan bagi tujuan perlindungan insurans deposit.